



Npi – 01/351 datë: 31.10.2024

Duke u bazuar në nenin 43 dhe 49 të Ligjit për Vetëqeverisjen Lokale, Nr. 03/L-040, si dhe në bazë të nenit 4.13 të Rregullores së Punës të Kuvendit dhe Komiteteve, Npi – 01/155 të datës 27.04.2023, për mbledhjen e Kuvendit të Komunës, të mbajtur më 31.10.2024, është nxjerrë ky:

**E K S T R A K T**  
**PROCESVERBAL**

I Mbledhjes së -X-të, të rregullt, të Kuvendit të Komunës së Shtimes, mbajtur më datë 31.10.2024 (e enjte), në ora 09:00h, në sallën e Kuvendit.

Në mbledhjen e Kuvendit, kanë marrë pjesë: Kryesuesi i Kuvendit, z.Adnan Ademi, anëtarët e Kuvendit: z.Besnik Seferi, z.Gëzim Haxhiu, z.Asllan Beqaj, znj.Shkurte Mustafa, znj.Sanije Sadiki, znj.ZejnijeVeliu, z.Kadri Emini, znj.Rrezartë Ramadani, z.Muhamet Ademaj, z.Artan Lubovci, z.Përparim Ramusa, z.Rrahman Jakupi, z.Lumni Amrush, znj.Besartë Musliu-Spahija, z.Hasan Avdyli, z.Hamëz Tërshani, znj.Albana Podvorica, znj.Adelina Beqaj, z.Rexhep Gashi dhe z.Reshat Mujota.

Përveç anëtarëve të Kuvendit në mbledhje kanë marrë pjesë edhe: Kryetari, z.Qemajl Aliu; Të gjithë drejtorët e drejtorive komunale; Shefja e Kabinetit të Kryetarit, znj.Anita Kurti; Nga Zyra për Informim; znj.Vlora Hyseni dhe z.Albion Shabani; Zyrtarë i TI-së, z.Shpëtim Gashi; Asistente e Kryesuesit të Kuvendit znj.Gentiana Mehmeti; Nga OSBE-ja z.Mefail Mustafa; Nga Radio Zëri i Shtimes, z.Muhamet Hoxha;

Mbledhjen e hapi Kryesuesi i Kuvendit, z.Adnan Ademi, i cili, pasi përshëndeti të gjithë të pranishmit dhe Konstatoi Kuorumin e mjaftueshëm për mbajtjen e mbledhjes, njoftoi Kuvendin me pikat e propozuara për këtë seancë, si vijon:

**RENDI I DITËS**

1. Shqyrtimi i Ekstrakt Procesverbalit nga mbledhja e mbajtur më: 27.09.2024,
2. Raporti nëntëmujor buxhetor Janar-Shtator 2024,
3. Draft-Rregullore për Taksa, Tarifa dhe Gjoba për vitin 2025, (diskutim publik)
4. Propozim-Vendim për formimin e Komisionit për dhënien e tokës komunale në shfrytëzim,
5. Propozim-Vendim për ndryshimin e Vendimit Npi-01/313 për banim të përbalueshëm sipas rekomandimit të MAPL-së Nr.020-618-5 dt.17.10.2024,
6. Propozim-Vendim për shpalljen e pronave të paluajtshme me interes të përgjithshëm,
7. Draft-Strategjia dhe Plani i Veprimit për personat me aftësi të kufizuar për periudhën 2025-28, (diskutim publik)
8. Propozim-Vendim për themelimin e vendgjuetisë në territorin e komunës së Shtimes,
9. Pyetje – Përgjigje.

**Kryesuesi, z.Adnan Ademi:** Hapi diskutimin për rendin e ditës.

**\* Kuvendi i Komunës së Shtimes me 11 vota “Për” me 10 vota “Kundër” dhe me 0 vota “Abstenim” miratoi rendin e ditës.**

#### Pika 1

Shqyrtimi i Ekstrakt Procesverbalit nga mbledhja e mbajtur më: 27.09.2024

**Kryesuesi, z.Adnan Ademi** hapi diskutimin për këtë pikë.

**Kryesuesi, z.Adnan Ademi:** Konstatoj Kuorumin prej 21 anëtarëve të Kuvendit, prezentë në mbledhje.

**\* Kuvendi i Komunës së Shtimes, me 18 vota “Për” me 0 vota “Kundër” dhe me 3 vota “Abstenim” miratoi Ekstrakt-Procesverbalin e Kuvendit nga mbledhja e mbajtur më 27.09.2024.**

#### Pika 2

Raporti nëntëmujor buxhetor Janar-Shtator 2024

**Kryesuesi, z.Adnan Ademi:** Për prezantimin e kësaj pike fjalën ia jap Besnik Ahmetit.

**z.Besnik Ahmeti, DBF:** Përshëndetje. Sot po e prezantojmë para Kuvendit Raportin 9 mujor që e kemi si obligim ligjor nga Ligji për Vetëqeverisjen Lokale si dhe Ligji për Financat Publike dhe Përgjegjësitë. Materialin e keni marrë dhe e keni lexuar, kështu që unë nuk do ta zgjati me detaje por do ti lexoj të dhënat sipas kodeve ekonomike dhe pastaj nëse ka ndonje pyetje do të pergjigjem (shih dokumentin).

**z.Përparim Ramusa:** Faleminderit për Raportin, ky është një raport real. Drejtor si është e mundur me pas një performance kaq të ulët të të hyrat vetanake. Në vazhdim lexoi nga raporti me shifra konkrete disa të dhëna dhe krahasoi me vitet paraprake.

**z.Besnik Ahmeti, DBF:** Faleminderit për pyetjet, Sa i përket inkasimit të hyrave vetanake ne kemi arritur deri në 30 % me i grumbulluar, mirëpo duhet me pas parasysh që komuna e Shtimes i ka falur mbi 300.000 €. Në raport ne projeksonet i kemi realizuar 99.96%. Pjesa komplet e këtijë projekti do të përfundon në muajin Nëntor.

**z.Përparim Ramusa:** Çka ka lidhje kjo me tatimin në prone kur është minus 81%?

**z.Besnik Ahmeti, DBF:** Nëse shkojmë mbrapa, na del që kemi diferenca edhe më të larta. Në raport shihet qartë që ne projeksonet i kemi arritur në maksimum.

**z.Muhamet Ademaj:** Faleminderit për raportin. Raporti është real, dhe ka pjesët e tijë ku tregojnë realizimin e buxhetit sipas përqindjeve. Shihet se të hyrat vetanake në vitin 2024 në krahasim me vitin 2023 janë për 30% më pak, por e spjegoi drejtori pse. Ne jemi për miratimin e këtijë raporti dhe do ta votojmë.

**z.Rexhep Gashi:** Faleminderit për raportin, që e bërë një elaborim. Sa i përket investimeve kapitale nuk jamë i kënaqur. Në vazhdim lexoi disa shifra në document lidhur me shpenzimin e buxhetit dhe bëri një pyetje, se pse jemi këtu me zero dhe çka ka ndodhur me frybilancin?

**z.Besnik Ahmeti, DBF:** Të rekomandoj Rexhep për me lexuar kolonën pak më lartë ku spjegohet se përqindja është 97% e që kjo është në krahasim me mjetet e alokuara.

**znj.Adelina Beqaj:** Përshëndetje. Pytja ime është ku me lexu unë në raport për shpenzimet e drekave zyrtare edhe për shpenzimet për fushatë?

**z.Besnik Ahmeti, DBF:** Merre dhe hynë në veb faqen e komunës dhe aty i sheh të gjitha shpenzimet të detajuara.

**z.Asllan Beqaj:** Përshëndetje. Sa për sçarim Pasqyrat financiare, bëhen një her në vit, këtu jemi duke diskutuar për raportet financiare të cilat bëhen katër her brenda vitit ose çdo tre muaj. Për këtë raport me diskutuar është krenari, dhe unë personalisht jam shumë i kënaqur për shumë arsye. Realizimi i buxhetit me 77% konform planifikimit është sukses, dhe kjo duhet të shikohet si tërsi e jo në formë të ndarë.

**z.Hamëz Tërshani:** Më ka mbetë në kry ajo që e tha drejtori, ti je ekonomist i mire, por ti e ke për detyrë me na spjeguar neve, e nuk është në rregull me reaguat ashtu si tha edhe vetë

parafolsi lidhur me çështjen që e ngriti Rexha, sepse realisht edhe unë e pat andërmend që ta ngriti. Kërkoj që pak më shumë me qenë njerëzor, sepse sot je ti aty në atë pozitë e nesër është dikush tjetër, prandaj të lutem me u përgjigjë në atë që tha Rexha.

**z.Asllan Beqaj:** Kolegët nuk e kanë dëgjuar fare drejtorin çka ka thenë. Raport më të thjeshtë e më të mire nuk ka. Mirë që po bëni pyetje por nuk po e bëni ndonjë pyetje të rëndësishme. Drejtori tha shkoni në veb faqen e komunës dhe aty i gjeni të gjitha informatat në detaje.

**znj.Adelina Beqaj:** veç një përgjigje e mora ama për dreka-darka e udhëtime zyrtare nuk mora përgjigje.

**z.Besnik Ahmeti, DBF:** Nuk është përgjegjësi e drejtorit me i mbaj të mend të gjitha shpenzimet. Për nëntëmujorin te zyra e kryetarit kemi një shumë simbolike prej 330 eurove.

**z.Besnik Seferi:** Është mire që ta shohim veten para se të bëjmë akuza te drejtori. Po flasim për një raport ku kemi investime në komunën tonë rreth 20 milion euro dhe këto të mira duhet me i pa dhe me ju gëzuar secili. Ju po kapeni me një pikë ku fare nuk ka rëndësi. Po shihen në teren që janë duke u bërë shumë punë. Mendoj se e kemi një ndër raportet më të mira që ka pas komuna e Shtimes ndonjëher.

**z.Rrahman Jakupi:** Unë mendoj se askush nuk ka të drejtë me na vlerësuar neve. Adelina e bëri një pyetje për dreka zyrtare e ju jeni munduar me hjekë nga raporti termin dreka zyrtare duke thenë shpenzime të brendshme. Nuk është korrekte me thenë 300 euro për shpenzime të Kryetarit, sepse unë e kamë informatën se janë mbi 12000 euro, më mire thuani kërkon në veb faqen e komunës. Është mirë me na mirë informu e jo me na keq informu sepse ne do ta zbulojmë.

**z.Besnik Ahmeti, DBF:** Te raporti ku bëhet fjalë për shpenzimet te zyra e Kryetarit, në planin kontabël të ri, u është ndrruar emërtimi i disa kodeve buxhetore, dhe nuk është më dreka zyrtare.

**z.Asllan Beqaj:** E para puna e kamarierit është e shëndetshme dhe e mire e nuk duhet me u keqtrajtu e keqinterpretu sepse i nënqmoni shumë punëtorë të qytetarisë. Ju po quditeni me këto pak shpenzime për dreka zyrtare, sepse ju jeni mësuar me shku jashtë Kosovës zyrtarisht e me kqyr ndeshje futbollit, dhe me shpenzu shumfish edhe me marr mëditje.

**z.Hamëz Tërshani;** Krahasimet me vitin 2018 është jo njerëzore. 300 euro shpenzime të Kryetarit nuk ka logjikë. Kryetari ka qenë në Gjermani, kështu që shpenzimet e Kryetarit normalisht që për mua kanë logjikë, por nuk është normale tendenca për me i mshefë ato. Nuk bënë me rrejtë se Kryetari i ka pru 20 milion euro investime, kjo është arrogancë dhe nuk është në rregull.

**z.Asllan Beqaj:** Nuk e di se si e kupton ti Hamëz arrogancën por arrogancë është me i bë pyetje drejtorit dhe me i thënë kthema përgjigjen ashtu qysh dua unë.

**z.Hamëz Tërshani:** Arrogancë, thash do të thot është gabim me i bërë 300 euro shpenzime sepse është dashur me i bërë 3500 euro psh. kjo është normale kështu e thash, mirpo tendenca për me mshefë thash është joserioze.

**z.Reshat Mujota:** Raporti bëhet edhe në bazë të hyrave e jo veq në bazë të shpenzimeve. Shqetësimi është te përqindja me minus psh. -88% tash meqenëse jemi me minus a ka humbur besimi i qytetarëve te kjo qeverisje, a çka u bë, sepse u krenojshi më heret. U fol 300 euro shpenzime te Kryetari këro shpenzime a janë shpenzime udhëtimi a çka meqenëse ka qenë në Gjermani?

**z.Besnik Ahmeti, DBF:** Shpenzimet janë të ndara edhe për udhëtime zyrtare jashtë vendit. Të gjitha shpenzimet te zyra e Kryetarit janë 2349 euro. Këto i gjeni te faqja e 7 e raportit.

**z.Reshat Mujota:** Faqe 7 te cila kolonë?

**z.Besnik Ahmeti, DBF:** Te tabela numër 3.

**Kryetari, z.Qemajl Aliu:** Përshëndetje, dua të jap një sqarim lidhur me shpenzimet, sepse mu përmend emri disa here. Nuk ka Kryetar Komune në Kosovë që ka shpenzime më pak se sa unë, sepse as unë e as kushdo tjetër nuk ka marrë asnjë mëditje për udhëtime jashtë shtetit. Unë kam qenë në Gjermani dhe e vërteta është se unë kam fjetur ose te shoku im ose te familjarët e mi për me i kursyer 4-500 euro. Prandaj po ju them se kursimi, morali, dhe dinjiteti janë pikat e

mija më të mira dhe më të fortat, prandaj me provuar me akuza ndaj meje në këto pika nuk funksionon fare sepse shifrat dhe argumentet janë kokfortë. Por për ju e kuptoj që e keni të vështirë që ta kuptoni, sepse kursimin nuk e keni pas asnjëher as në mendjen e juaj.

**Kryesuesi, z.Adnan Ademi:** Projektioni është në raport me realizimin rreth 15000 euro, dhe deri në fund të vitit mundet me ardhë deri në qind për qind. Është mire me lexuar raportin para se me ardhur në seancë, dhe me ditë e me parashtruar edhe pyetjen për drejtorin. Në vazhdim Konstatoi Kuorumin prej 17 anëtarëve të Kuvendit prezent në mbledhje.

**\* Kuvendi i Komunës, me 11 vota “Për” me 6 vota “Kundër” dhe me 0 vota “Abstenim” miratoi Raportin Buxhetor të Komunës së Shtimes për periudhën Janar-Shtator 2024.**

### Pika 3

#### Draft-Rregullore për Taksa, Tarifa dhe Gjoba për vitin 2025, (diskutim publik)

**Kryesuesi, z.Adnan Ademi:** Kemi Rekomandime nga Komiteti për Politikë dhe Financa dhe nga Komiteti për Komunitete të cilat i kanë rekomanduar Kuvendit miratimin e vendimit që Draft Rregullorja për taksa të shkojë në diskutim public. Para se ta hapi diskutimin për këtë pike, fjalën për prezantimin e kësaj pike ja jap Besnik Ahmetit.

**z.Besnik Ahmeti, DBF:** Siç e tha edhe Kryesuesi, ky draft ka me shku në diskutim public ku do të mund ta japin kontributin secili, dhe pastaj drafti vjen prap në Kuvend për miratim. Në këtë draft nuk ka asnjë ndryshim të propozuar nga drejtoritë. Ju ftoj që ta votoni, propozimin për diskutim publik.

**z.Besnik Seferi:** Edhe ne jemi pro që të shkojë në diskutim publik.

**\* Kuvendi Komunës, unanimitisht miratoi Vendimin për ta nxjerrë në Diskutim Publik, Draft-Rregulloren Komunale për Taksa, Tarifa dhe Gjoba për vitin 2025. Bartëse e procesit të diskutimit publik është Drejtoria Komunale për Buxhet dhe Financa në bashkëpunim me Zyrën për Informim.**

### Pika 4

#### Propozim-Vendim për formimin e Komisionit për dhënien e tokës komunale në shfrytëzim

**Kryesuesi, z.Adnan Ademi:** Edhe për këtë pike e kemi Rekomandime nga Komiteti për Politikë dhe Financa ku i rekomandon Kuvendit miratimin e vendimit për formimin e Komisionit për dhënien në shfrytëzim pronën e paluajtshme komunale. Kërkoj propozimet e juaja për formimin e këtijë Komisioni.

**z.Rexhep Gashi:** Unë mendoj se në këtë Komision duhet të jenë disa anëtarë që kanë përvojë. Ne e kemi këtu present një anëtarë që e njeh punën e komisionit dhe i vlerëson operatorët. Unë pra e propozoj Reshat Mujotën në këtë Komision.

**z.Muhamet Ademaj:** Në emër të pozitës ne e propozojmë Aran Lubovcin.

**Kryesuesi, z.Adnan Ademi:** Nga ekzekutivi i kemi këta emra, njëri është jurist nga Drejtoria për Planifikim Urban, Kadastër dhe Gjeodezi, Shqiprim Hyseni, dhe tjetri është nga Zyra Ligjore Halil Kurtishi. Ndërsa nga Shoqëria Civile po presim me na ardhur një emër.

**z.Përparim Ramusa:** Nuk është në rregull për anëtarin nga shoqëria civile, ndërsa për anëtarët nga ekzekutivi nuk kemi vërejtje.

**z.Grejtalb Emini, DPUKGJ:** Përshëndetje. Unë mendoj se ata (shoqëria civile) duhet me u taku dhe me vendosë për një emër, dhe pastaj e inkorporojmë në vendim. Unë nuk e di që ka ndonjë arsye ose ndonjë mekanizëm që me vendosë kundër atijë emri që e propozojnë ata si përfaqësues të shoqëris civile.

**z.Reshat Mujota:** Ne nuk jemi kundër, por me na pyet neve dikush a e keni votuar anëtarin e pestë nuk mund ti themi se po. Unë jam për me shty për mbledhjen e radhës, dhe me votu pastaj komplet.

**z.Përparim Ramusa:** Nuk mund të folni për transparencë kur nuk e keni emrin e personit nga shoqëria civile. Edhe unë propozoj për me u shty për mbledhjen e radhës.

**z.Rrahman Jakupi:** Ky Komision është i rëndësishëm, dhe anëtarët duhet të jenë profesionist. Ne si opozitë po kërkojmë emër të anëtarit të pestë nga shoqëria civile. Në kuptimin ligjor nuk është në rregull. Praktikrat janë të ndryshme.

**z.Besnik Seferi:** E dëgjova parafolsin kur tha se janë mbrojtë interesat e shoqërisë civile. Ky person duhet me ditë rendësinë e OJQ-ve sepse ka punuar aty sikurse edhe unë. Praktikrat tregojnë se shumë vendime në këtë Kuvend përpara janë marrë pa e pasë emrin e anëtarit nga shoqëria civile. Kjo është e vërteta. Në fillim ne këtë pike e aprovuam me futë në rendin e ditës e tash po thuani me shty.

**z.Kadri Emini:** Në KPF-ë keni thenë se ky vendim është i vonuar, e tash po propozojnë për me u shty. Unë nuk po e shoh të arsyeshme për me u shty. Ky Komision nuk vendosë por Kuvendi do të vendos për pronat. Edhe unë jamë për me riplotësu në mbledhjen e radhës. E formojmë si Komision dhe në mbledhjen e radhës e votojmë formalisht vetëm emrin e anëtarit të shoqërisë civile.

**Kryesuesi, z.Adnan Ademi:** Nuk mund ta formojmë një Komision me numër qift prej 4 anëtarëve. Ekzekutivi ka mandat me i propozuar emrat nga administrate komunale që i kemi, Shqiprim Hyseni dhe Halil Kurtishi, ndërsa nga opozita Reshat Mujota dhe nga pozita Artan Lubovci.

**z.Asllan Beqaj:** Ne nuk mundemi me ua kushtëzuar atyre, se kur me zgjedhë dhe me na e sjellë emrin e tyre. Ne e votojmë vendimin për formimin e Komisionit, dhe OJQ-të e binë emrin e tyre dhe inkorporohet në vendim.

**z.Rexhep Gashi:** Kryetari i ka pru emrat e anëtarëve të Komisionit nga ekzekutivi mirë, por i kemi 5 anëtarë të Komisionit, dhe emrin e anëtarit të pestë nuk e kemi emrin se cili është anëtari i pestë.

**Kryesuesi, z.Adnan Ademi:** Sqaroi, se e kemi emrin, shoqëria civile, dhe ata e sjellin emrin që e zgjedhin vetë.

**z.Lumni Amrushi:** Përshëndetje. U diskutua gjatë, faji po mbetet jetim, po duhet me bërë tejkalim të rregullores. Unë mendoj se është dashur me pas një thirrje publike, dhe e kishe kry me këtë emër, dhe po ta kishe kry me kohë tash e kishim votuar dhe nuk do kishte asnjë problem. Por tash po duhet me tejkalu rregulloren. Unë kërkoj që mos të përsëritet më kjo, dhe mos të vihet në Kuvend pa emrat komplet.

**z.Reshat Mujota:** Qysh me nejtë edhe unë në këtë Komision, pa qenë edhe anëtari i pestë i Komisionit. Me 4 anëtarë sigurisht që kthehet vendimi prapa nga MAPL-ja për rishqyrtim. Nëse nuk ka emër nga shoqëria civile ose ta bëjmë dikend nga Kuvendi ose ta shtyjmë për mbledhjen e radhës.

**Kryesuesi, z.Adnan Ademi:** Brenda 7 dite shkojnë vendimet e Kuvendit në MAPL-ë dhe atje ne do ta qojmë vendimin me 5 emra të anëtarëve të Komisionit. Në vazhdim Konstatoi Kuorumin prej 20 anëtarëve të Kuvendit prezent në mbledhje.

**\* Kuvendi i Komunës, me 19 vota “Për” me 0 vota “Kundër” dhe me 1 votë “Abstenim” miratoi vendimin për formimin e Komisionit vlerësues për shqyrtimin e kërkesave që kanë të bëjnë me dhënien në shfrytëzim, pronën e paluajtshme komunale, i përbërë prej 5 anëtarëve si vijon: 1. Halil Kurtishi – nga ekzekutivi komunës. 2. Shqiprim Hyseni – nga ekzekutivi komunës. 3. Artan Lubovci – nga Kuvendi (pozita). 4. Reshat Mujota – nga Kuvendi (opozita). 5. Imer Tershana – nga organizatat joqeveritare, (Klubi i Biznesit – Shtime).**

#### Pika 5

Propozim-Vendim për ndryshimin e Vendimit Npi-01/313 për banim të përballueshëm sipas rekomandimit të MAPL-së Nr.020-618-5 dt.17.10.2024

**Kryesuesi, z.Adnan Ademi:** Këtë vendim Npi-01/313 dt.27.09.2024, për ndarjen e parcelës për banim të Përballueshëm dhe Social në Komunën e Shtimes e kemi votuar në mbledhjen e kaluar të Kuvendit, MAPL-ja përkatësisht MMPHI-ja, e ka kthyer në rishqyrtim dhe na ka

rekomanduar që të plotësohet baza ligjore e këtijë vendimi edhe me nenin 25 i Ligjit Nr.03/L-164 për Financimin e Programeve të Veçanta të Banimit”, sipas rekomandimit të MMPHI-së, Nr.6498-2/24 dt. 17.10.2024. Hpi diskutimin për këtë pikë. Meqenëse diskutime nuk ka atëherë Konstatohet Kuorumin prej 20 anëtarëve të Kuvendit prezent në mbledhje.

\* **Kuvendi i Komunës, me 19 vota “Për” me 0 vota “Kundër” dhe me 1 votë “Abstenim” miratoi vendimin për plotësimin e bazës ligjore të vendimit të Kuvendit me numër Npi-01/313 të datës 27.09.2024, si vijon: “Nenin 25 i Ligjit Nr.03/L-164 për Financimin e Programeve të Veçanta të Banimit”, sipas rekomandimit të MMPHI-së, Nr.6498-2/24 dt. 17.10.2024.**

**Kryesuesi, z.Adnan Ademi:** Pas kësaj pike po shkojmë në pauzë të drekës në ora 11:32h dhe kthehem në mbledhje në ora 13:30h.

**Kryetari, z.Qemajl Aliu:** Me këtë rast të pauzës ju ftoj të gjithëve që bashkërisht të shkojmë dhe ta qesim gurthemelin për fillimin e punimeve në rrugën Petrovë përkatësisht Luzhak – Rancë, një investim mbi 400.000 euro.

#### Pika 6

##### Propozim-Vendim për shpalljen e pronave të paluajtshme me interes të përgjithshëm

**Kryesuesi, z.Adnan Ademi:** Ky propozim ka kaluar nga Komiteti për Politikë dhe Financa dhe nga Komiteti për Komunitete dhe i kanë rekomanduar kuvendit që ta aprovojmë. Për prezantimin e kësaj pike fjalën ja dha Grejtalb Emini.

**z.Grejtalb Emini, DPUKGJ:** Përshëndetje. Materialin për këtë propozim e keni marrë. Bazën Ligjore e keni pa, dhe sot e kemi sjellë këtë propozim në Kuvend për miratim. Pronat që do të shpronësohen për hapjen e rrugës së re që i lidh rrugën “Villiam Voker” me rrugën “12 Qershori” i keni të gjitha në propozim-vendim. Ju ftoj që ta votoni, dhe nëse ka ndonjë pyetje jam këtu që të përgjigjem.

**z.Muhamet Ademaj:** Ne si grup parlamentar AKR-LDK e përkrahim vendimin për hapjen e kësaj rruge të re, sepse kjo rrugë është në interes të gjithë qytetarëve.

**z.Rexhep Gashi:** Ne nuk mund të themi se jemi kundër sepse është në interes të qytetarëve, por mënyra është e pa pranueshme, sepse ju po punoni me bagera e këtu e keni pru vendimin për miratim. Këto prona nga rruga “Villiam Voker” deri te rruga “12 Qershori” janë prona private që duhet të shpronësohen, a po e dëmtoni buxhetin, sepse pikërisht këtu është keqmenagjim, edhe këtu edhe në Pjetërshticë.

**z.Përparim Ramusa:** Për këtë pikë kemi diskutuar gjatë edhe në KPF-ë. Pajtohem me parafolësin, sepse çdo rrugë është e mirëseardhur. Sot po punohet aty e ne po flasim për shpronësim. Ne nuk mund të dalim kundër rrugës, mirëpo me ndodhë e me thane sot Kuvendi jo, atëherë si do të ja bëni ju. Unë nuk jam kundër hapjes së rrugës dhe kamë me e votuar “për” por po i shkelni procedurat.

**z.Reshat Mujota:** Është e moralshme, njerëzore e ligjore që një her me i shpronësuar pronat e pastaj me ja filluar punimeve aty. Pse nuk po i bëni me kohë? Unë jamë “për” por procedurat ju kisha lutur me i bërë me kohë, sepse duhet me qenë transparent. Unë mendoj se duhet me mbajtë takim me banorët e pronave dhe me pas një procesverbal dhe me pa nëse ata banorë janë “për”.

**z.Besnik Seferi:** Edhe ne si grup parlamentar i LVV-së jemi “për” miratimin e këtijë vendimi ashtu siç ka ardhur në Kuvend.

**Kryesuesi, z.Adnan Ademi:** Konstatohet Kuorumin prej 18 anëtarëve të Kuvendit prezent në mbledhje.

\* Kuvendi i Komunës, me 17 vota “Për” me 0 vota “Kundër” dhe me 1 votë “Abstenim” miratoi vendimin për shpallje me interes të përgjithshëm, Ngastrat Kadastrale si vijon:

Nr.	Numri i ngastrës Kadastrale	Sipërfaqja m <sup>2</sup> :	Zona Kadast:	Kualiteti i Klasës:	Prona në emër të: ose (Bashkëposedim)
1	P-72809093-01744-0	609	Shtime	Tokë Ndërtimore-Oborr	Ahmet Ramadani Muhamet Ramadani
2	P-72809093-01745-0	2724	Shtime	Arë - Klasa e 2/ Bujqësore Arë - Klasa e 3/ Bujqësore	Ahmet Ramadani Muhamet Ramadani
3	P-72809093-01747-2	600	Shtime	Arë - Klasa e 2/ Bujqësore	Imri /Bislim/ Shala Agim /Bislim/ Shala Fatmir /Bislim/Shala
4	P-72809093-01747-3	1038	Shtime	Arë - Klasa e 2/ Bujqësore	Rifat /Faik/ Ramadani
5	P-72809093-01747-4	771	Shtime	Arë - Klasa e 3/ Bujqësore	Mustaf /Azem/ Fazlija
6	P-72809093-01747-5	745	Shtime	Arë - Klasa e 3/ Bujqësore	Kadri /Azem/ Fazliu
7	P-72809093-01747-8	360	Shtime	Arë - Klasa e 3/ Bujqësore	Enes /Fehmi/ Fazliu
8	P-72809093-01747-9	346	Shtime	Arë - Klasa e 3/ Bujqësore	Arton /Fehmi/ Fazliu
9	P-72809093-01773-1	72	Shtime	Tokë Ndërtimore - Shtëpi	Adem /Hysen/ Bleta
10	P-72809093-01773-2	49	Shtime	Tokë Ndërtimore - Shtëpi	Adem /Hysen/ Bleta
11	P-72809093-01773-3	582	Shtime	Arë - Klasa e 1/ Bujqësore Tokë Ndërtimore - Oborr	Adem /Hysen/ Bleta
12	P-72809093-01774-4	2382	Shtime	Arë - Klasa e 2/ Bujqësore	Adem /Hysen/ Bleta
13	P-72809093-01775-0	424	Shtime	Tokë Ndërtimore – Shtëpi Tokë Ndërtimore - Oborr	Adem /Hysen/ Bleta
14	P-72809093-02929-1	4585	Shtime	Arë - Klasa e 2/ Bujqësore	Gani /Hamit/ Pajaziti
15	P-72809093-03010-0	4976	Shtime	Arë - Klasa e 2/ Bujqësore Arë - Klasa e 3/ Bujqësore	Bajrush /Faik/ Ramadani

#### Pika 7

#### Draft-Strategjia dhe Plani i Veprimit për personat me aftësi të kufizuar për periudhën 2025-28, (diskutim publik)

**Kryesuesi, z.Adnan Ademi:** Për prezantimin e kësaj pike, fjalën ja dha Mimoza Salihu-Qeriqi. **znj.Mimoza Salihu-Qeriqi, DSHMS:** Përshëndetje. Ne e kemi diskutuar edhe në KPF-ë dhe meqenëse ka me shku në diskutim publik dhe ka mundësi me dhënë komentet e veta secili atëherë nuk po e zgjasim sot në trajtimin e materialit, por ju ftoj që ta votoni vendimin për diskutim publik.

**znj.Albana Podvorica:** Përshëndetje, për personat me aftësi të kufizuar unë po rekomandoj që me i plotësuar kushtet për me pasë qasje të lirë dhe të mjaftueshme në të gjitha institucionet, qofshin ata me karroca, shurdhë-memec ose kategori tjera të tyre, sepse pikërisht në këtë strategji duhet të parashihet mundësia për një qasje më të lehtë të tyre, me qëllim të integritimit në shoqëri.

**z.Besnik Seferi:** Mendoj se është bërë një punë e mire, me këtë draft-strategji. Edhe unë edhe të tjerët bashkërisht është mire që po bëjmë diçka për integrimin e kësaj kategorie të personave me aftësi të kufizuar. Në Shtime kemi rreth 294 persona me aftësi të kufizuar. Nuk do të lëshohem në diskutim më të gjatë meqenëse ka me shku në diskutim publik dhe aty do ta japim kontributin tonë.

**z.Përparim Ramusa:** E përgëzoj drejtoreshën për një plan të tillë. Këta persona janë besoj edhe më të mirë se ne, prandaj unë personalisht e përkrahu këtë draft-strategji që të shkojë në diskutim publik.

**z.Kadri Emini:** E përkrahu propozimin e Albanës. Kërkoj nga ti drejtoresh që neve anëtarëve të Kuvendit me na i dërguar ftesat me e-mail, por edhe mundësisht ftesa për diskutim publik me ju shku secilit person me aftësi të kufizuar.

**z.Reshat Mujota:** Faleminderit për këtë draft-strategji dhe plan veprimi. Ju lusim drejtoresh që ky plan mos me mbetur veq në letër, por ju si ekzekutiv me ju dhënë përparësi personave me aftësi të kufizuar në konkurimin e tyre në ndonjë vend pune.

**znj.Mimoza Salihu-Qeriqi, DSHMS:** Ju falënderoj për diskutimet dhe pyetjet e juaja, por edhe unë po e kërkoj ndihmën e juaj qoftë në identifikimin e personave me aftësi të kufizuara, qoftë edhe në ndihmën që mund tu japim në qfarë do forme kësaj kategorie të shoqërisë sonë.

**Kryesuesi, z.Adnan Ademi:** Konstatoj Kuorumin prej 17 anëtarëve të Kuvendit prezent në mbledhje.

**Kuvendi Komunës, unanimitisht miratoi Vendimin për ta nxjerrë në Diskutim Publik, Draft-Strategjinë dhe Planin e Veprimit për personat me aftësi të kufizuara për periudhën 2025-2028. Bartëse e procesit të diskutimit publik është Drejtoria për Shëndetësi dhe Mirëqenie Sociale në bashkëpunim me Zyrën për Informim.**

#### Pika 8

##### Propozim-Vendim për themelimin e vendgjuetisë në territorin e komunës së Shtimes

**Kryesuesi, z.Adnan Ademi:** Për prezantimin e kësaj pike, fjalën ja dha Gojart Bajrami.

**z.Gojart Bajrami, DBPZHR:** Përshëndetje. Sot e kemi sjellë në Kuvend për miratim Propozim-Vendimin për themelimin e vendgjuetisë në territorin e komunës së Shtimes. Sipas Ligjit Nr.02/L-53 për Gjuetinë, jemi të obliguar për me përcaktu vendgjuetinë e përbashkët, me vendim të Kuvendit, sipas kritereve që i parasheh ky ligj. Materialin e keni marrë me kohë dhe e keni lexuar, prandaj unë nuk do ta zgjati shumë, por nëse ka ndonjë pyetje do të bëj përpjekje që të përgjigjem. Ju ftoj që ta votoni këtë propozim-vendim.

**znj.Adelina Beqaj:** Faleminderit drejtor për këtë propozim-vendim, mua po më intereson me ditë ....?

**z.Rexhep Gashi:** Nuk e kamë të qartë, këtu në fillim të dokumentit ku keni thënë në fshatin Zotaj janë 400 hektar me pyje, ndoshta keni bërë gabim teknik.

**z.Muhamet Ademaj:** E falënderoj drejtorin për këtë propozim-vendim që e ka sjellë në Kuvend. Ne si grup parlamentar AKR-LDK do ta përkrahim dhe do ta votojmë.

**z.Reshat Mujota:** Ka pas edhe përpara vendgjueti. Mirëpo mua po më interesojnë këto statistikat për llojet dhe numrin e kafshëve të egra në komunën tonë, unë vërtetë nuk e di se si janë marrë këto statistika, far eksperti duhet të jetë ai që i ka numëruar, kështu që po e kërkoj një sqarim nga drejtori se mbi bazën e kujt janë dhënë këta numra. Po kërkoj sqarim me arsyetimin se nuk dëshiroj që të dalim qesharak me këto statistika.

**z.Përparim Ramusa:** Faleminderit për propozim-vendimin, meqenëse po bëhet fjalë këtu për 14 hektarë, është mirë që me na tregu drejtori se për far prone po bëhet fjalë këtu, a janë prona publike apo private?

**z.Gojart Bajrami, DBPZHR:** Informatat për këtë propozim-vendim i kemi marrë nga zyrtarët tanë por edhe nga gjahtarët. E dimë që shifrat mund të janë të pa sakta por këtë të dhëna janë vetëm në fazën fillestare, dhe do të përpunohen. Vendet e ndaluara për gjueti janë të parapara me nenin 24 të Ligjit për Gjuetinë Nr.02/L-53 si vijon:

a) Zonat e natyrës posaçërisht të mbrojtura në të cilat me aktin e shpalljes si zonë e mbrojtur apo ndonjë akt tjetër të veçantë është ndaluar gjuetia si: Rezervati strikt i natyrës, Parku nacional, Monumenti i natyrës, Zona menaxhuese e habitateve ose e llojeve të mbrojtura, Peizazhi i mbrojtur, Zona e mbrojtur e resurseve natyrore. b) Tokat brenda 300 metrave nga vendbanimet, rrugët kryesore publike, ndërtesat fetare, shkollat, dyqanet ose zyrët. c) Varrezat, aeroportet, bazat ushtarake dhe oborret e mbyllura. d) Fidanishtet, pemishtet, vreshtat dhe kopshtet të destinuara për prodhim intensiv në sipërfaqe deri në 100 ha nëse janë të rrethuara me rrethojë e cila e pengon migrimin natyror të kafshëve të egra.

**znj.Adelina Beqaj:** A i keni pyetur pronarët e pronave private se a lejojnë gjuetinë në pronat e tyre?

**z.Gojart Bajrami, DBPZHR:** Sqaroi, se kjo hapsirë e paraparë me vendim të Kuvendit është vendgjueti e përbashkët e cila do tu ipet në menagjim, personave fizik ose juridik, përmes procedurës së (koncesionit ose dhënjes me qera) duke i zbatuar procedurat e tenderimit, përkatësisht ofertimit publik, konform dispozitave ligjore.



Komuna e Shtimes do të lidhë kontratë me përfituesin e tenderit për menagjimin e vendgjuetis së përbashkët në Komunën e Shtimes. Kontrata duhet të jetë e bazuar në këtë vendim si dhe duhet të përmbajë përveq të tjerave edhe elementet e parapara të nenit. 36, 37, dhe 38 të Ligjit për Gjuetinë Nr.02/L-53.

**Kryesuesi, z.Adnan Ademi:** Konstatoj Kuorumin prej 18 anëtarëve të Kuvendit prezent në mbledhje.

**Kuvendi i Komunës, me 16 vota “Për” me 0 vota “Kundër” dhe me 2 vota “Abstenim” miratoi, Vendimin për caktimin e Vendgjuetisë së përbashkët në territorin e komunës së Shtimes, në sipërfaqe prej 13.450,8 hektar, duke u kufizuar me kufijt administrativ të Komunave, Ferizaj, Lipjan dhe Therandë (Suharekë).**

#### Pika 9

#### Pyetje - Përgjigje

**Kryesuesi, z.Adnan Ademi:** Hapi diskutimin për këtë pikë.

**z.Muhamet Ademaj:** Pyetje për drejtorinë e Urbanizmit, Kadastër dhe Gjeodezi, kur do të fillojë trotuari në rrugën “Skender Salihaj” dhe “Hyrë Emini”?

**z.Rexhep Gashi:** Pyetje për DPUKLGJ-në, drejtor a është pranue teknikisht rruga Godanc-Gjyrkovc, saktësisht te rruga “Ibrahim Rugova” që kalon prej Godancit? Dhe pyetja tjetër për DSHP-në, drejtor, këto pikët e stacionit të autobusave a janë pranuar teknikisht, sepse unë i di dy raste të cilat gjatë punësimit janë me xham të krisura, dhe nëse janë pranuar teknikisht si ka mundësi me u pranuar ashtu me xhama të krisura?

**z.Besnik Seferi:** Unë realisht nuk kam pyetje. Du ta di a është e planifikuar edhe çështja e rrugës “Shefket Muhadini” po ashtu edhe rruga “Janina” në Davidovc? Po ashtu e kam edhe një shqetësim që ka të bëjë me rregullimin e rrugës magjistrale Belinc-Carralevë ku vërtet u bë një kaos i madh aty dhe është demoluar ajo rrugë e nuk e di ku është problematika aty, ne e kemi për detyrë me shprehë si shqetësim sepse ajo rrugë po paraqet rrezik të madh, prandaj i rekomandoj drejtorisë të merr hapa konkret për rregullimin e kësaj rruge sa nuk është bërë ndonjë dëm i madh. Pyetja tjetër ka të bëjë me planifikimin më konkretisht asfaltimin e rrugës “Lasgush Poradeci” në Muzeqinë në një segment te saj meqenëse, e kemi një bashkëqytetarë tonin Hasan Bajrami, i cili thot se ka bërë një kërkesë të vazhdueshme te drejtoria përkatëse për të cilën gjë duhet me ja dhënë një përgjigje se a do të bëhet apo jo. Pyetje për DSHP-në, drejtor si është duke qëndruar situata e rregullores apo ..... në Komunën e Shtimes?

**znj.Adelina Beqaj:** Pse ikën anëtarët e kuvendit të pozitës ku shkuan, a i dinë interesat e qytetarëve? Edhe kjo është pyetje e drejtuar pozitës, na krejt ktu jena. Pyetje për DSHP-në pse nuk po mirëmbahen trotualet nëpër fshatra? Për deri sa keni kontraktuar kompani. Trotualet nuk po mirëmbahen janë të mbushura me bari. Pyetja tjetër e përsëritur për DPUKLGJ-në, qka po ndodhë me shtëpinë e të pames në fshatin Petrovë?

**z.Përparim Ramusa:** Unë nuk dua me pyet kurgjë ekzekutivin por dua me të pyet ty Besnik, a je ti ai që lufton prej 2017 për ç’do mbledhje thojshje që pika pyetje-përgjigje me hy e para e sot je palu këtu edhe voton gjithë që kjo pikë me qenë e fundit. E dyta Besnik unë prita prej teje me pyet ekzekutivin konkretisht për problemin e Rashincës, që 220 nënshkrime janë mbledhë që janë kundër qati projekti, ti ktu vjen me ba populizëm edhe me postu një video qaty kishe po bej punë. Besnik tu kisha lutë banë pak ma shumë për këtë punë.

**z.Besnik Seferi:** Mua më bëri pyetje Përparimi, dhe unë duhet ti përgjigjem. Po përgjigjem në pyetjen e dytë së pari. Po ndihem mirë që edhe ju e keni marrë shprehinë time për me postuar video nëpër Facebooka, kjo është diçka e mirë. Sa i përket populizmit unë realisht shumicën e kërkesave që i kam bërë unë shumica veq janë realizuar. Pajtohem plotësisht me ate të Rashincës që ndoshta është një prej pyetjeve që është dashur me pyet e që tash e shfrytëzoj rastin për me pyet është qështja e ujësjellësit në fshatin Rashincë. Realisht për këtë çështje edhe unë i kam shqetësimet e mija, ndoshta për faktin atje janë disa banorë të pa kënaqur me

furnizimin me ujë për pije, pyetja për drejtorinë është se ku është dhe si është projekti i ujësjellësit të fshatit Rashincë? Dua një pyetje konkrete drejtor.

**z.Përparim Ramusa:** Besnik njëri prej faktorëve që nuk e la me hy në rendin e ditës Ujësjellësin e Rashincës je ti, se votove kundër që me hy në rendin e ditës.

**z.Reshat Mujota:** Si shqetësim por edhe si kërkesë, për DKA-në shkolla “Emin Duraku” paralelja në fshatin Belinc ka probleme me nxemjen dhe ka shqetësime të prindërve që ose me gjet një zgjidhje për nxemje me energji elektrike me ndonje termo të rrymës ose zgjidhje tjetër? Kanë thënë se kalldaja ka problem me pompen dhe nuk po funksionon. Pyetja e dytë është për DSHP-në pyetje po bëj ka 5-6 her por përgjigjet nuk i kam marrë. Pyetje konkrete Deponitë ilegale kanë evalou në gjitha tokat bujqësore sidomos në teritorin e Shtimes, ka banorë që edhe kanë bërë fjalë me njerzit duke hedhur mbeturina, jo vetëm qytetarë por ka edhe prej Kompanive. Dmth. toka e bukës po shëndrrohet në deponi ilegale të mbeturinave. Pyetjen tjetër e kam për DZHE-në për disa rrugë të arave në fshatin Mollopolc, ende nuk kanë filluar dhe nuk ka asnjë lëvizje, kurë do të fillojnë punimet? Janë të interesuar banorët ta dinë. Kisha dashur konkretisht përgjigje direkte me ma dhënë e jo me shkrim. Ndërsa sa i përket DSHP-së përgjigjen me ma kthy edhe me shkrim.

**znj.Albana Podvorica:** Pyetje për DPUKGJ-në, te rruga “Skender Salihaj” afër shkollës “Emin Duraku” sa kam informata drejtor, ende nuk ka trotuar, kur do të bëhet rregullimi i trotuarit, këtë shqetësim e kanë edhe shoqëria civile, a do të bëhet rregullimi i trotuarit këtë vit apo kurë?

**z.Lumni Amrushi:** Lidhur me ate që tha Besniku se shumica e kërkesave janë kryer, amo Besnik punët po kryhen në mënyrë selektive. Kam unë pyetje konkrete Besnik, kur do të përfundojë palestra në fshatin Pjetërshticë? Për drejtorinë e Arsimit, oborrin e shkollës, rrethojen e shkollës shkoj mandati asnjë mirëmbajtje nuk ja kanë bërë? E mos të flasim për brenda shkollës. Pastaj kur do të përfundon një Kazermë Muze në fshatin Pjetërshticë? Shkronjat e UÇK-së janë të parat në nivel vendi dhe tash janë bërë të vjetra, aty ka munguar gjithçka deri tash. Kur do të bëhet pastrimi i lumit përmes fshatit që nuk është bërë asnjëher? Kur do të bëhet renovimi i atyre rrugëve që siç është rruga “Idriz Ajeti” që e lidhë fshatin Pjetërshticë me fshatin Krojmir?

**znj.Besartë Musliu-Spahija:** Faleminderit për fjalën Kryesues, atëherë pyetja ime është për DSHP-në, për rrugën “Emrushit” dhe rrugën “Selim Selimi” a do të bëhet ndriqimi në këto dy rrugë? Pyetja e dytë është për DPUKGJ-në, pyetje nga banorët e lagjeve “Londra”, “Berlini”, “Parisi” e tjerë kur do të.....? Pyetja tjetër është për DKA-në se pse nxënësit parashkollor të paraleles së ndarë në Belinc janë privuar të shkojnë në shkollën “Emin Duraku” në Shtime?

**Kryetari, z.Qemajl Aliu:** Përsëritje, faleminderit Kryesues, për shkak të agjendës nuk mund të qëndrojë gjatë dhe desha me i dhanë disa përgjigje. Pyetje u bënë për ujësjellësin në fshatin Rashincë, ku më shumë ka tentim për me u politizu, se sa që ja don të mirën ujit dhe Rashincës. Ne kemi pas takim me disa persona që i kanë ngre shqetësimet e tyre gjoja për faljen e fondeve. E vërteta është që atje po ndërtohen përmes një projekti të përbashkët që e kemi Komuna e Shtimes me KRU “Prishtina”, edhe dy Puse të reja dhe një impijant të grumbullimit dhe trajtimit të ujit, ku do të shtohet kapaciteti i ujit prej 20 litrave në sekond sa ishin shtohen edhe 20 litra për sekond, dhe kapaciteti i përgjithshëm do të jetë 40 litra për sekond, me qka për komplet fshatrat e rrafshit do të zgjidhet çështja e ujit të pijes. Ky është një lajm i mirë, i cili duhet me u prit mirë nga të gjithë. Këtë përzgjedhje dhe këtë projekt e ka bërë vetë KRU “Prishtina” si menagjuese e ujësjellësit me injinjerët dhe ekspertët e vetë. Ne realisht nuk mund të diktojmë në këtë fushë kur ajo ka mbi 50 ekspert të ujit, dhe ne ti tregojmë se ku ka rezerva nëntoksore të ujit. Kte ua kam treguar edhe atyre banorëve të fshatit Rashincë që janë shqetësuar. Ekspertët e kompanisë e thonë se uji do të merret në një thellësi nën 20 metra thellësi, e deri në 40 metra. Uji i ujësjellësit nuk ka asnjë lidhje me ujërat të ashtuquajtur sipërfaqësor të puseve private që mund të jenë nga 2 deri 8 metra. KRU “Prishtina” garantojnë të gjithë banorët e fshatit por edhe të tjerët se shtimi i kapaciteteve me pusët dhe impijantin nuk kanë asnjë ndikim lidhur me shqetësimet që i paraqesin ata, kte po e them që ta dëgjojnë edhe të

gjithë qytetarët e fashit Rashincë por edhe më gjerë. Ne e kemi për detyrë që të gjitha familjeve në komunën tonë me u sjellë ate që është elementare pra ujin e pijes. Ky është një projekt mbi 280 mijë euro. Po ashtu vitin e ardhshëm ne do të fillojmë me shtrirjen e rrjetit të ujësjellësit nga burimi për ç' do familje të fshatit Pjetërshticë. Kështu që me këto fonde 500 mijë euro për fshatin Pjetërshticë dhe me 280 mijë euro për fshatrat e rrafshit, ne mendojmë që çështja e ujit të pijes që ishte problem i madh 25 vjeçar në komunën e Shtimes, përfundimisht do të zgjidhet. Edhe një herë u bëj thirrje të gjithë banorëve të fshatit Rashincë që mos të shqetësohen sepse ka analiza profesionale nga Ingjinjerët që shpimet nuk do të ndikojnë fare në bunaret e tyre për të cilat po shprehin shqetësim. Nëse ka pakësim të ujit në bunaret e tyre kjo nuk vjen si pasojë e puseve të ujësjellësit por si pasojë e ndryshimeve klimatike që kanë ndikim në përgjithësi.

**z.Rexhep Gashi:** Jemi te pika e rendit të ditës pyetje-përgjigje, na në fillim kërkuam që të futet në rendin e ditës çështja e ujit në lidhje me banorët e Rashincës, ndërkohë që Kryetari na dha një sqarim, a ka mundësi ti bëj pyetje Kryetarit? Kryetar ku i kanë bërë këto matje, ku unë nuk dyshoj te matjet e shtetit, por unë dyshoj te periudha kohore që e kanë matë, dhe për këtë a keni pas paraprakisht para se të fillojnë punimet për hapjen e këtyre puseve edhe hapja e kanaleve për shtrirjen e tubacionit për ujësjellës a keni pas takim me banorët e fshatit Rashincë?

**Kryetari, z.Qemajl Aliu:** Unë nuk është se ja kam shikuar afatin e skadencës të atij projekti. Kështu që unë nuk e kam fare dyshimin në kapacitetet profesionale të KRU "Prishtina", sepse kjo është një nga KRU-të më të mëdhaja në Kosovë, i ka ekspertët e vetë. Ata e kanë një projekt të detajuar i cili tregon që rezervat ujore nëntokësore më të mëdha në komunën e Shtimes janë pikërisht në zonën të fshatrat Gllavicë e Rashincë. Ju e dini që aty janë disa prona publike në të cilat do të bëhet shpimi. Sa i përket takimit me qytetarë, për hirë të vërtetës ne nuk kemi pas takim me qytetarë ekskluzivisht vetëm për këtë çështje, sepse kemi konsideru se ai është një projekt profesional i mirëfilltë i KRU-së në interes kryesor të banorëve atje, dhe këto puse ekzistuese edhe ato që do të bëhen të reja nuk e cenojnë në asnjë formë askend, Më vonë ka dalë ky shqetësimi nga banorët e fshatit Rashincë, por unë edhe një herë i garantoj jo mbi bazën e njohurive të mija por mbi bazën e sqarimeve që mi kanë dhënë ekspertët e KRU "Prishtina". Aty janë ujërat nëntoksor ku uji do të merret nën thellësinë e 20 metrave dhe këto ujëra nëntoksore nuk mund ti ndikojnë këto ujërat horizontale që i mbushin puset private të banorëve. Nëse shfaqet nevoja ne do të shkojmë dhe ti takojmë banorët një nga një, unë dy herë jam takuar me mbi 20 qytetarë të fshatit Rashincë, ku edhe ua kemi shpjegju kështu që e thash më parë. Kjo po bëhet në radhë të parë për të mirën e fshatit Rashincë, por pastaj edhe të gjitha fshatrave të rrafshit, madje edhe qytetit të Shtimes e më gjerë me lidhjen e gypave që do të bëhet. E fundit nuk duhet të jemi egoist dhe për arsye të një pusi (Bunari) privat nuk mund ti lëmë banorët pa furnizim me ujë për pije. Ne nuk kemi qëllime dashakeqe, qëllimi është shumë human, fisnik dhe qytetarë.

**z.Kastriot Shabani, DZHE:** Përshëndetje. Përgjigje për asambleistin Mujota. Vlera komplet e projektit është 135 mijë euro. Kontrata parashihet për muajin Shtator. Vlera sivjet është 15.000 euro. Po bëjmë përpjekje me i kry punët për vlerën që e ka sepse afër jena dhe ishalla kushte atmosferike na mbajnë dhe kryhet edhe pjesa që është e paraparë për fshatin Mollopolc. Pjesë tjera ku ka qenë më urgjente janë kry, tani janë duke u kryer në fshatin Petrovë.

**Kryesuesi, z.Adnan Ademi:** Meqenëse diskutime të tjera nuk ka, dhe përgjigjet tjera do ti merrni me shkrim, atëherë mbledhjen e Kuvendit e përfundoj në ora: 14:45h.

Procesmbajtësi  
Idajet Rexhepi



Kryesuesi i Kuvendit  
Adnan Ademi

